

Drs. Witteveen contento di a entrega Aruba back un memoria colectivo arkeologico

ORANJESTAD (AAN) - Durante e conferencia di prensa cu ta tuma lugar ayera mainta, tocante e tres coleccionnan arkeologico di Aruba cu worde repatria for di e museo di Antiyas, señora leteke Witteveen, director di "National Archaeological Anthropological Museum" di Antiyas tambe a hiba palabra.

El a gradici presencia di prensa den un acto cu el a considera hopi importante pa nos memoria colectivo. y no solamente pa loke ta regarda Aruba, Antiyas y Hulanda, pero henter Caribe.

Señora drs. Witteveen a duna di conoce cu trece back e coleccionnan arkeologico na nan respectivo islanan tabata un iniciativa di sr. Ayoubi, cu tabata e anterior director di NAAM. Esaki tabata na 1983 cu nan a bin di Hulanda pa e museo na Antiyas, pero despues di esey nada mas a sosode.

"Te cu nos na Curacao a cuminsa cu esey no ta logico. Cu e coleccionnan cu a bin di investigacionnan haci na e diferente Islanan mester ta den nan respectivo lugar. Nos semper tin condicion pa recibí back e coleccion. Por ehemplo, actualmente nos

tin e situacion cu tin coleccion di investigacion arkeologico di Saba y Sint Eustatius na gran cantidad na Hulanda (Leiden) y na Merca na Florida. Nan ta dispuesto pa traspasa nan coleccionnan pero no tin un deposito adecua pa ricibi nan", drs. Witteveen a menciona.

El a agrega cu den e desaroyo aki tin dos banda di medaya, y na prome lugar ta importante pa e hendenan di e Islanan aki percura pa tin contacto y "grip" riba loke ta worde investiga den e respectivo paisnan. "Cu coleccionnan di investigacion, sea Arkeologico, Antropologico, of trabao bao di awa, no ta bay sin e permiso di e pais concerni" señora Witteveen a expresa, y el a duna sr. Dijkhoff razon cu via prensa mester concientiza nos pueblo cu e material cu ta historia di nos pasado, mester keda den cas. "E di dos ta e pasonan politico pa trece e piezanan back, loke no ta facil. Berdad tin coleccionnan mas interesante cu ta na Leiden ainda, y nos ta den conversacion cu e Museum voor Volkenkunde na Leiden, pa haya asistencia pa wak si nan por bin back.



Nan tin balor internacional y nan ta contento cune. Pero enberdad, nos hunto cu mas sosten di nos pueblo mester crea e conciencia y e condicionnan pa ricibi nan back, expone nan, y pone nan den un contexto of interpretacion historico den nos memoria", e director di NAAM a expresa.

El a duna di conoce cu hunto cu Museo Arkeologico Aruba, NAAM ta carta e tarea y como NAAM nan ta hacie pa cinco isla incluso cu nan poco capacidad,

pasobra nan no tin un Arkeologo paga den servicio.

"Mas cu nos ta pretende cu nos ta proteha, documenta y investiga nos renchi arkeologico y antropologico nos no tin na Curacao ni na Bonaire un hende paga pa haci e trabao aki. Kiermen, tin hopi tarea pa nos concientiza nos politiconan y nos hendenan pa nos haya nos propio investigadornan y nos leyman pa proteha nos material, y pa capacita nos educadornan pa duna les den un contexto tan fascinante cu ta di Caribe", el a expresa.

El a splica cu e coleccion cu a bin back Aruba ta parti di un memoria colectivo tanto di Falcon como di nos islanan cu tin un historia comun, y e ta contento cu, cu ayudo di Aruba nan a haya sa mas di e historia aki. "Pa nos ta un alegria pa entrega back e coleccion pero pa nos ta un alegria hopi grandi tambe pa haya mas informacion y mas conocimiento di e coleccion. Pesey nos ta trahando hunto y nos ta spera cu den futuro nos por traha hopi mas hunto pasobra nos mester di otro urgentemente", señora drs. Witteveen, director di NAAM, a conclui.